



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

27. Kalenderwoche – ab 04. Juli 2010

Ach, Naffi...!

Nee, es dud werglisch Fraun gähm, die sinn ganz annersch geschdriggd, als wie meine Gudste. Ährlisch - es dud Fraun gähm, die ham eene Englsgeduld... eene Neddishckeed un Nachsischdkeed mid de Fehlör von ihm Mann... ooch wenn dähr dauornd Bleedsinn machn dud! Ja, isch hab so eene Frau jedzde werglisch kenngelernd. Un isch bin hin un weg! Isch hab misch reschleschd in die vorliebd. Se heeßd Naffi un had eene Schdimme wie e Engl! Sähr seggsy! Wobei isch eischendlich nisch weeiß, wie die aussähn dud. Isch kenn ja ehm bloß ihre Schdimme un ihr Wähns. Mir dun leidör bloß middenandör redn. Das heeßd, eischendlich dud ja bloß die redn. Wenn isch was sachn du, das heerd die nisch. Direggd andwordn off misch, das kann die nisch. Abor wie die misch ehm so behandeln dud... von sisch aus... - das is werglisch das gladde Geeschndeel von meinör Gudstn. Wenn Naffi zum Beischbiel sachn dud, das isch de näschsde Schdraße nach lings abbieschn muss... - die näschsde lings! Biegen Sie lings ab! - un isch biesche nisch lings ab, dann gibbds keen eenzischn beeßn Don. Die dud dann eenfach neu bereschnen.

Wenn meine Gudste sachn dud, dass isch lings abbieschn soll, un isch hab das nisch gemachd, abor da is was los! Schläfsd du schon odor fährtst du noch? Blindgängör! Ja, meine Gudste sachd ofd zu mir solsche freindlischn Sachn! Da is Blindgängör noch ziehmlich harmlos!

Nee, de Naffi sachd nie solsche Sachn zu mir! Oooch wenn isch dreima hinnornandör nisch das mach, was die gesachd had... - da gibbds eenfach kee beeses Word. Die dud mein Willn eenfach agzebdiern un dud vorsuchn, eene Schdraße zu findn, off dähr isch drodzdähm noch an mei rischdisches Ziel komm due. Odor wenn isch ma e bißl zu schnell bin... - nisch wie meine Gudste:

Ras nisch so rum! - nee, da sachd de Naffi ganz ruisch... fasd zärdlich sachd die - Bidde beachdn Sie die Geschwindischkeid! - un dann du isch die ooch beachdn, de Geschwindischkeid!

Wenn misch meine Gudste so anherrschn dud - Gas weg! - da du isch eischendlich meisdens gahr nisch odor nur sähr langsam reagiern. Fahr isch odor du?! - sach isch heeschdens noch.

De Andword dud mir dann abor ooch nischd nidzn - Du fährt, abor wie dähr ledzde Gurgnoffguß!

Ja, meine Gudste had schon ma "wie dor ledzde Gurgnoffguß" gesachd. Was das sein soll - e Gurgnoffguß - das weeiß isch ooch nisch, abor fesd schdehn dud, dass Naffi sowas nie zu mir sachn däde. Nie! Naffi dud misch immor behandln, als wie wenn isch e gleichbereschdischdor Bardnor sein däde. Daderbei is die ja werglich viel schlauor als wie isch. Die weeiß eenfach alles! Die weeiß, off welschor Schdraße isch grade fahr du, die weeiß, wie isch fahrn muss, wenn isch nach sonsdewo will... - un wenss noch so weid weg is... odor wenss eene kleene Gasse in Osdsibirjen sein däde... die däde misch hinfiehrn! Ohne Meggorn! Meine Gudste däde de Fahrd schbädesdens an dor bolnischn Gränze vorsuchn zu undorbindn. De Naffi däde mid mir bis ans Ende dor Weld fahrn! Nee, warum duds sowas von Frau nisch in leif gähm? Ach, Naffi...!

Eduard Sachsenmeyer